

ÁKVÖRÐUN FJÁRMÁLAÆFTIRLITSINS

um aðra breytingu á ákvörðun Fjármálaeftirlitsins, dags. 9. október 2008

um ráðstöfun eigna og skulda

Landsbanka Íslands hf., kt. 540291-2259, til Nýja Landsbanka Íslands hf., kt. 471008-0280.

Samkvæmt heimild í 100. gr. a. í lögum nr. 161/2002 um fjármálafyrirtæki, sbr. 5. gr. laga nr. 125/2008 um heimild til fjárveitingar úr ríkissjóði vegna sérstakra aðstæðna á fjármálamarkaði o.fl., tekur Fjármálaeftirlitið eftirfarandi ákvörðun um ráðstöfun eigna og skulda Landsbanka Íslands hf.:

FORSENDUR:

Í ákvörðun Fjármálaeftirlitsins frá 9. október 2008 um ráðstöfun eigna og skulda Landsbanka Íslands hf. til Nýja Landsbanka Íslands hf. (nefnd „fyrri ákvörðun“ nema annað sé tekið fram) var tekið fram að ákvörðunin byggði á fyrirliggjandi upplýsingum og gögnum. Reyndist hún byggð á ófullnægjandi eða röngum upplýsingum um málsatvik, eða aðrar forsendur ákvörðunarinnar brygðust verulega, gæti Fjármálaeftirlitið gert hvers konar breytingar á ákvörðuninni, þ.m.t. fellt hana úr gildi í heild eða að hluta. Fyrirvari þessi var talinn nauðsynlegur í ljósi þess hve ákvörðunina bar brátt að og vegna þeirra ríku hagsmuna sem fólgnir voru í því að koma í veg fyrir að starfsemi Landsbanka Íslands hf. stöðvaðist þann 9. október sl. Þann 12. október s.l. tók Fjármálaeftirlitið ákvörðun um að breyta þessari ákvörðun í þá veru að Nýi Landsbanki Íslands tæki ekki við réttindum og skyldum samkvæmt afleiðusamningum eins og fyrri ákvörðun hafði gert ráð fyrir. Í lok þessarar ákvörðunar er tekið fram að sú breyting sem nú er gerð og jafnframt sú sem gerð var þann 12. október sl. gildi í lögskiptum aðila frá 9. október sl.

Í ljósi nýrra upplýsinga og breyttra forsendna sem komið hafa fram við skoðun á málefnum Landsbanka Íslands hf. eru gerðar eftirfarandi breytingar á fyrri ákvörðun:

1. Við 1. tl. fyrri ákvörðunar bætast nýir málslíðir: nema að því marki sem þau eru sérstaklega undanskilin í samantekt með nýjum stofnefnahagsreikningi. Réttindi og skyldur samkvæmt afleiðusamningum flytjast ekki yfir til Nýja Landsbanka Íslands hf.
2. Við 2. tl. fyrri ákvörðunar bætist nýr málslíður: Nýi Landsbanki Íslands hf. skal þó standa Landsbanka Íslands hf. skil á sérgreindum tryggingum viðskiptamanna eftir því sem við á vegna kröfuréttinda og afleiðusamninga sem ekki flytjast yfir til Nýja Landsbanka Íslands hf. við þessa ákvörðun eða samkvæmt síðara samkomulagi.
3. Við 3. tl. fyrri ákvörðunar bætist nýr málslíður: nema að því marki sem slík réttindi eru sérstaklega undanskilin í samantekt með nýjum stofnefnahagsreikningi.
4. Við 9. tl. c. lið bætist nýr málslíður: sem eiga eða áttu virkan eignarhluta í Landsbanka Íslands hf.
5. Við 9. tl. bætist nýr málslíður: e) aðrar sérstaklega tilgreindar ábyrgðir samkvæmt upptalningu í samantekt með nýjum stofnefnahagsreikningi.
6. Við ákvörðunina bætist nýr tölulíður, 10. tölulíður. Hinn nýi 10. tölulíður er svohljóðandi: Yfirteknar eru veðskuldir er hvíla á fullnustueignum sem flytjast til Nýja Landsbanka Íslands hf.

7. Við ákvörðunina bætist nýr töluliður, 11. töluliður og þeir töluliðir sem á eftir koma eru tölusettir til samræmis. Hinn nýi 11. töluliður hjóðar svo: Um nánari meðferð einstakra liða í skiptingu efnahagsreiknings er kveðið á um í sérstöku skjali sem Fjármálaeftirlitið hefur staðfest („Forsendur fyrir skiptingu efnahagsreiknings“) og drögum að nýjum stofnefnahagsreikningi og meðfylgjandi samantekt. Nýi Landsbanki Íslands hf. skal varðveita öll gögn sem tengjast lögbundnum gagnasöfnum m.t.t. peningabvættisreglna, bókhalds o.þ.h.
8. Ákvæði 12. tl. (áður 10. tl.) um frest til að ljúka mati á eignum og skuldum skal breytt þannig að síðasti málsliður hljóði svo: Niðurstaða matsaðila skal liggja fyrir innan 90 daga frá ákvörðun þessari.
9. Við ákvörðunina bætist nýr töluliður, 14. töluliður. Hinn nýi 14. töluliður hljóðar svo: Framsal kröfuréttinda samkvæmt þessari ákvörðun skal ekki svipta skuldara rétti til skuldajöfnuðar sem hann átti gagnvart fyrri kröfuhafa eða þrotabúi hans. Við uppgjör skv. 12. og 13. tl. skal áætla fjárhæð sem vegna skuldajöfnunar gæti dregist frá þeim kröfum Nýja Landsbanka Íslands hf. sem hann yfirtekur samkvæmt þessari ákvörðun.
10. Í stað viðauka með fyrri ákvörðun kemur viðauki þar sem fjallað er um þær eignir sem ekki eru framseldar til Nýja Landsbanka Íslands hf. Efni hans er svohljóðandi:

Efirtaldar eignir Landsbanka Íslands hf. verða ekki framseldar til Nýja Landsbanka Íslands hf.

Eignir

- a. Kröfur á fjármálafyrirtæki þar sem Fjármálaeftirlitið hefur gripið til aðgerða á grundvelli ákvæða 5. gr. laga nr. 125/2008.
- b. Verðbréf útgefin af fjármálafyrirtækjum þar sem Fjármálaeftirlitið hefur gripið til aðgerða á grundvelli ákvæða 5. gr. laga nr. 125/2008.
- c. Kröfur og sjóðsstreymi vegna krafna veðsettar öðrum fjármálafyrirtækjum.
- d. Allar eignir erlendra útibúa Landsbanka Íslands hf. að undanskildum hæfum útlánnum í Helsinki og hæfum útlánnum tengdum sjávarútvegi í Halifax og Noregi.
- e. Kröfur Landsbanka Íslands hf. á útibú sín erlendis og dótturfélög.
- f. Eignarhlutir í erlendum dótturfélögum.
- g. Útlán í verulegri tapsáhættu, skv. nánari útlistun í samantekt með stofnefnahag.
- h. Aðrar eignir sérstaklega tilgreindar í samantekt og sem tekið er tillit til í stofnefnahag hins nýja banka.

Nánari sundurliðun er í stofnefnahagsreikningi og skýringum með honum í sérstakri samantekt.

ÁKVÖRÐUN:


Fjármálaeftirlitið ákveður hér með að taka upp og breyta ákvörðun sinni frá 9. október 2008 um ráðstöfun eigna og skulda Landsbanka Íslands hf. til Nýja Landsbanka Íslands hf. Henni skal breytt til samræmis við þá tíu töluliði sem að framan greinir. Ákvörðunin frá 9. október 2008, ásamt fyrstu breytingarákvörðun frá 12. október 2008, er nú jafnframt staðfest með áorðnum breytingum sem gildandi ákvörðun um ráðstöfun eigna og skulda.

Ákvörðunin tekur þegar gildi og skal hún, ásamt breytingarákvörðuninni frá 12. október 2008, vera bindandi í lögskiptum aðila frá 9. október 2008 í samræmi við áorðnar breytingar.


Ákvörðun þessi byggir á fyrirliggjandi upplýsingum og gögnum. Reynist hún byggð á ófullnægjandi eða röngum upplýsingum um málsatvik, forsendur ákvörðunarinnar bregðast verulega eða Fjármálaeftirlitið telur að önnur skipan mála sé nauðsynleg getur Fjármálaeftirlitið gert hvers konar breytingar á ákvörðun þessari, þ.m.t. að fella hana úr gildi í heild eða að hluta.

FJÁRMÁLAEFTIRLITIÐ

19. október 2008



Jón Sigurðsson
Formaður stjórnar



Jónas Fr. Jónsson
Forstjóri

VIÐAUKI


með ákvörðun Fjármálaeftirlitsins, dags. 9. október 2008, sbr. breytingu dags. 12. október og 19. október 2008, með áorðnum breytingum.

Efirtaldar eignir Landsbanka Íslands hf. verða ekki framseldar til Nýja Landsbanka Íslands hf.

Eignir

- a. Kröfur á fjármálafyrirtæki þar sem Fjármálaeftirlitið hefur gripið til aðgerða á grundvelli ákvæða 5. gr. laga nr. 125/2008.
- b. Verðbréf útgefin af fjármálafyrirtækjum þar sem Fjármálaeftirlitið hefur gripið til aðgerða á grundvelli ákvæða 5. gr. laga nr. 125/2008.
- c. Kröfur og sjóðsstreymi vegna krafna sem veðsettar eru öðrum fjármálafyrirtækjum.
- d. Allar eignir erlendra útibúa Landsbanka Íslands hf. að undanskildum hæfum útlánnum í Helsinki og hæfum útlánnum tengdum sjávarútvegi í Halifax og Noregi.
- e. Kröfur Landsbanka Íslands hf. á útibú sín erlendis og dótturfélög.
- f. Eignarhlutir í erlendum dótturfélögum.
- g. Útlán í verulegri tapsáhættu, skv. nánari útlistun í samantekt með stofnefnahag.
- h. Aðrar eignir sérstaklega tilgreindar í samantekt og sem tekið er tillit til í stofnefnahag hins nýja banka.

Nánari sundurliðun er í stofnefnahagsreikningi og skýringum með honum í sérstakri samantekt.

Two handwritten signatures in black ink, one on the left and one on the right, appearing to be initials or names.